

**Uunga siunnersuut: Siusinaartumik pensionisiat pillugit Inatsisartut inatsisaata  
allanngortinneqarneranik Inatsisartut inatsisaat nr. xx, xx. xxx. 2018-imeersoq.  
(Oqaatsitigut naqqiutit)**

*(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)*

**pillugu**

**Ilaqutariinnermut Peqqissutsimullu Ataatsimiititaliap**

**siunnersuutip aappasaaneerreqarneranut**

**ISUMALIUTISSIISUTAA**

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq  
Inatsisartunut ilaasortaq Stine Egede, Inuit Ataqtigiit, siulittaasup tullia  
Inatsisartunut ilaasortaq Jess Svane, Siumut  
Inatsisartunut ilaasortaq Aqqaluk Heilmann, Atassut  
Inatsisartunut ilaasortaq Malene Vahl Rasmussen, Demokraatit  
Inatsisartunut ilaasortaq Mikivuk Thomassen, Inuit Ataqtigiit  
Inatsisartunut ilaasortaq Sara Olsvig, Inuit Ataqtigiit

UKA 2018-imi ulloq 10. oktober 2018-imi siullermeerinninnerup kingorna ataatsimiititaliap siunnersuut sukumiisumik misissorpaa.

**Siunnersuutip imarisaa siunertaalu**

Siusinaartumik sulisinnaajunnaarnersiutit pillugit siunnersuut Inatsisartut inatsisaannut atuuttumut allannguutissatut siunnersuutit ilusiligaavoq. Siusinaartumik sulisinnaajunnaarnersiutit pillugit inatsisilerinikkut allanngortinneqarnissaa pillugu Inatsisartut inatsisaat nr. 40, 23. november 2017-imeersumi § 17, imm. 4, oqaaseqatigiit aappaanni kalaallisut danskisullu oqaasertaliussat allanngortinneqarnissaat allannguutissatut siunnersuummi siunertarineqarpoq, tamatuma saniatigut inatsimmi pineqartumi § 29 allannguutissatut siunnersuutip inatsisitigut ilusiligaanera aqqiiviginiarneqarluni.

**Siunnersuutip Inatsisartunit siullermeerneqarnera**

Siunnersuut 10. oktoberip 2018 siullermeerneqarpoq partiillu: Siunnersuutip ilusiligaanerata oqaatsitsigullu iluarsivigineqarnissaa taamaallaat pineqarnera innersuussutigalugu Siumumit, Inuit Ataqatigiinnit, Demokraatinit aamma Atassumit siunnersuut ilusimisut iluseqartillugu akuerineqarnissaa tapersinnaavaat.

Siunnersuummi iluarsissutigittinniarneqartut siusinaartumik soraarnerussutisialinnut atugassarititaasunik ajorseriartitsissasut Partii Naleqqap Suleqatigiissitsisullu oqaatigaat, taamaattumillu siunnersuutip kingunerisassai sukumiisumik nalilivigineqarnissaat kissaatigalugu.

**Tusarniaanermi akissutit**

Piffissami pineqartumi siunnersutip [www.naalakkersuisut.gl-imi](http://www.naalakkersuisut.gl-imi) tusarniaavimmi tamanut saqqummiunneqarnerata saniatigut piffissami 17. maj 2017-imiit 15. juni 2017-imut tusarniaanermi attuumassutilinnut tusarniaassutigineqarsimasumut siunnersuut assingummat allannguutissatut siunnersuut una tusarniaassutigineqarsimangitsoq ataatsimiititaliamit maluginiarneqarpoq.

Inatsisilerinikkut pissuteqartumik siunnersuummullu siusinnerusukkut tusarniaassutigineqartumut imarisamigut allaanerunnginnera pissutigalugu ataatsimiititaliamit tamakkiisumik tusaatissat tiguneqarpoq.

**Ataatsimiititaliap siunnersuummik suliarinninnera**

Aapparissinnaasap isertitai apeqqutaatinnagit siusinaartumik soraarnerussutisiallit tunngaviusumik soraarnerussutisiaqalernissaat siunnersuummi qulakkeerniarneqartoq ataatsimiititaliamit maluginiarneqarpoq. Tamanna soorlu siusinaartumik soraarnerussutisiaqarneq pillugu Inatsisartut inatsisaata allanngortinneqarnera pillugu inatsisartut inatsisaata nr. 40, 23. november 2017-imeersumik kukkunertalimmik UKA 2017-imi akuersissuteqarnermi piumasaqaataasimasoq.

Tunngaviusumik soraarnerussutisianut atatillugu siusinaartumik soraarnerussutisialinnut aningaasatigut atugaasaritinneqartussatut naalakkersuinikkut kissaatigineqartoq 2017-imi siunnersuutigineqartoq matumani malinneqartoq, tamatumalu kingorna inatsisip tassungalu nassuiaatit naalakkersuinikkullu siunertarineqartut imminnut naapertuunnerat qulakkeerneqartoq ataatsimiititaliamit maluginiarneqarpoq.

Annerpaamik siusinaartumik soraarnerussutisiat, matumanilu katissimallutik aapparissap, nalunaarsorsimallunilu inooqatigisap imaluunniit aapparissap ullumikkut isertitaannut attuumassuteqanngitsumik annerpaamik siusinaartumik soraarnerussutisianik, tunngaviusumik soraarnerussutisiat 50 pct.-tiisa nalinginik minnerpaamik akissaasersuisoqarnissaa siusinaartumik soraarnerussutisiallit minnerpaamik pisartagaqarnissaannik inatsimmi atuuttumi § 17, imm. 4, oqaaseqatigiit siulleq allannguuteqartinneqanngitsoq

ersarilluinnartuosorlu ataatsimiititaliamit erseqqissaatigineqarpoq. Matumani inatsimmi aalajangersakkami § 17, imm. 4-mi oqaaseqatigiit aapaanni kukkuneq takuneqarsinnaavoq, taannalu § 17, imm. 4-mi oqaaseqatigiit siulliannut naapertuuttunngortinneqassaaq.

Taamatutaaq § 29-p inatsisilerinikkut iluarsiivigineqarnissaa pillugu kissaatigineqartoq ataatsimiititaliamit isumaqatigineqarpoq.

Siusinaartumik soraarnerussutisiat pillugit Inatsisartut inatsisaata allanngortinneqarnissaa pillugu siunnersuutip UKA 2017/17-p aappassaaneerineqarnissaanut ataatsimiititaliap isumaliutissiissutaanut ataatsimiititaliaq innersuussissaaq, matumani tunngaviusumik soraarnerussutisianik tunniussisarnermut aamma angalanernut atatillugu § 29-mut tunngatillugu naalackersuinikkut kissaatigineqartut naalackersuinikkullu paasinnineq naapertuupput.

Siusinaartumik soraarnerussutisartut pillugit malittarisassat atuuttut allanngortinneqarnissaat pillugu naalackersuinikkut kissaatigineqarpat tamanna pillugu siunnersuummik saqqummiussisoqarsinnaavoq.

Siusinaartumik soraarnerussutisiat pillugit malittarisassat naapertorlugit kommunalbestyrelsip aalajangiinera innuttaasunit Isumaginninnermi Maalaaruteqartarfimmut naammagittaaliuutigineqarsinnaasut naggataatigut ataatsimiititaliamit erseqqissaatigineqassaaq, taamaaliornikkut kukkusoqassagaluarpas iluarsiiissuteqarnissamut periarfissiisoqarsinnaaqullugu.

### **Siunnersuutip aningaasatigut kingunerisassai**

Siunnersuutip pisiviusunngortinneqarnissaanut aningaasatigut kingunerisassaanut tunngatillugu, siusinaartumik soraarnerussutisiat pillugit Inatsisartut inatsisaata allanngortinneqarnissaa pillugu Inatsisartut inatsisaat nr. 40, 23. november 2017-imut nassuiaatit allanngortinnagit malinneqarnissaat innersuussutigineqarpoq.

Oqaatigineqartut ataatsimiititaliamit tusaatissatut tiguneqarput.

### **Ataatsimiititaliap inassuteqaataa**

**Siunnersuut ilusimisut iluseqartillugu akuerineqassasoq ataatsimiititaliap isumaqatigiittup inassutigaa.**


Taama oqaaseqarluni isumaliutissiissummilu oqaatigineqartut paasinnilluni siunnersuut ataatsimiititaliap aappassaaniigassanngortippaa.




Laura Táunâjik  
Siulittaasoq



Stine Egede  
Siulittaasup tullia




Jess Svane




Aqqaluk Heilmann



Malene Vahl Rasmussen



Mikivsuk Thomassen



Sara Olsvig